

(圖 | 王美書)



冬雪阿姨个 乳豬仔

在恁寒又恁暗个時節有人來？門正打啊開，就看著冬雪阿姨手項拗等一包東西。

文 | 劉菊英／龍潭長老教會長老

寒天个北風

寒天个北風就像潑婦樣仔，雞嫲杈擎起來亂亂杈，刺骨个冷風像利利个刀仔，咻咻滾滾等過，早早就將日頭逐轉屋下去了！

日頭轉屋去，無一下仔就暗摸胥疏了。這個潑婦北風毋單將日頭逐走，連燈盞火佢都愛欺負喔！佢正點啊著个佢又摻佢欺烏忒去，滿哪暗摸叮咚又冷到會高毛。大人細仔早早就囧到被骨竇，佢遽遽將功課寫好，尖到姐婆脣个被骨鑽落去。燒燒个人氣衝等，暖暖个被骨奔等，無一下功夫佢就睡忒去了！

冬雪阿姨个愛心

好恬恬聽推門聲，續等聽著「阿隆伯、阿隆伯」氣急急仔个喊門聲。姐公遽遽跋跣床去看發生麼个事情，仰會在恁寒又恁暗个時節有人來？門正打啊開，就看著冬雪阿姨手項拗等一包東西，姐公開嘴正愛問，冬雪阿姨就講：「阿隆伯，這條乳豬分豬嫲砵著，

可能畜毋生了！毋過還燒燒，你愛無？」

姐公心肝歡喜，遽遽應講愛，就將乳豬仔接過來，連連承蒙冬雪阿姨个恩情。在佢這個缺少食糧个家庭肚，這條乳豬仔，就像天早時个及時雨，分全家人加添營養分；冬雪阿姨个愛心像珍珠瑪瑙，雖然細細嘎十分貴重打眼。

因為該央時，不管係大豬、細豬也係死豬，都做毋得自家劇，故所姐公將燈盞火放低低的，就驚會分人看著。透夜喊阿姨跣起來暖水搨手劇乳豬，細心細義將乳豬仔劇好，打料、滷鹽留等來傍飯。

逐擺若想著該一暗晷，就盡感謝冬雪阿姨个愛心，分佢一家人在刺骨个寒天肚感受大大个溫暖。



本文母語聲音QR Code